

黃

帝

內

經

堂

問

校

義

光緒癸未暮春

蛟川二仁堂梓

序

漢志錄醫家言首黃帝內經隋志有全元起注內經已佚不可盡見今所傳惟唐王冰注本章句已非全氏之舊矣然古字古義尙有存者明以來傳刻本尤多淆亂庸師俗工習非成是莫可究詰續溪胡君荻甫精華小學中年多病畱心方書得宋本內經用元熊氏本明道藏本及唐以前載籍勘正之多所發明如飲食有節起居有常不妄作勞全元起注本云飲食有常節起居有常度不妄不作君謂作與詐同月令毋或作爲淫巧鄭注曰今月令作爲爲詐僞不妄與不作相對爲文作古讀若胙上與者數度爲韻下與俱去爲韻王氏改不妄不作爲不妄作勞是誤讀作爲作爲之作而以作勞連文殊不成義又不知持滿不時御神君謂時善也不時御神謂不善御神也小雅頍弁

篇爾穀旣時毛傳時善也又夫上古聖人之教下也皆謂之全元起注本云上古聖人之教也下皆爲之君謂下皆爲之言下皆化之也書梓材厥亂爲民論衡效力篇引作厥率化民是爲卽化也作謂者爲之借字王氏吳以謂爲告謂之謂乃升下字於上句也字之上失其指矣又唯聖人從之故身無奇病君謂奇當爲苛字形相似而誤苛亦病也古人自有複語字本作疴說文疴病也下文逆之則災害生從之則苛疾不起是謂得道上承此文而言則奇病之當作苛病明矣苛疾與災害對舉則苛亦爲病明矣又道者聖人之愚者佩之君謂佩讀爲倍說文倍反也聖人之愚者佩之謂聖人行道愚者倍道也荀子大略篇一佩易之注佩或爲倍是古通用之證又故聖人傳精神君謂傳當爲搏字之誤也搏與專同言聖人精神專一不旁

驚也古書專一字多作搏繫辭傳其靜也專釋文專陸作搏昭
二十五年左傳若琴瑟之專壹釋文專本作搏史記秦始皇紀
搏心揖志索隱搏古專字皆其證又此陰陽更勝之變病之形
能也君謂能讀爲態荀子天論篇耳目鼻口形能各有接而不
相能也形能亦形態楚辭九章固庸態也論衡累害篇態作能
漢書司馬相如傳君子之態史記徐廣本態作能皆古人以能
爲態之登竝因刊正文字達其訓故別白精審渙然冰釋雖於
全書尙未卒業然帙緒已立必有賡續之者壽曾嘗論醫家之
有內經博大精深與儒家之五經同而無義疏之學海內學人
而知醫者曷卽王冰之注輔以全氏逸義用治疏法說其聲訓
名物更采靈樞難經以下古醫家言疏通證明俾軒岐大業昭
揭於世不爲庸師俗工所部則君此書其先河矣因讀君書附

論及之

光緒辛巳春三月癸亥朔儀徵劉壽曾識於冶城山館

戶部郎中胡君葵甫事狀

同治十一年歲在壬申八月十四日葵甫戶部以疾卒於京邸年四十有八訃至培系爲文哭之君所箸內經校義今刑部尙書潘伯寅先生爲刻於都中培系以南方學者不易觀乃重爲刊布自念與君少同學長同志知君最深刻旣竟因撰次君之行事爲狀以乞志傳俾後世有考焉君諱澍字葵甫一字甘伯號石生績溪縣城北人先世三山公諱舜陟宋大觀三年進士歷官徽猷閣待制贈少師宦蹟見宋史本傳箸有論語義師律陣圖奏議文集詠古詩三山老人語錄仲子茗溪公諱仔知晉陵縣事箸有孔子編年茗溪漁隱叢話

國朝收入

四庫全書傳至明充賓公諱思伸萬厯乙未進士官至右僉都

御史巡撫保定等府提督紫荆等關宦蹟見府縣志著有督撫奏議邊垣圖紀是爲君八世祖自充寰公以下入

國朝潛德弗耀君之曾祖

公諱立三贈儒林郎祖時未

公諱仕未例授登仕郎贈儒林郎晉贈朝議大夫父正暉公諱尙昱例授儒林郎侯選直隸州同知贈奉政大夫曾祖母高氏贈贈安人祖母許氏贈安人晉贈恭人母周氏生母程氏俱贈宜人庶母葉氏例封安人州同公性孝友家夙貧慮無以爲旨乃棄儒而賈柱來江浙間數十年遂致饒裕以好義博施聞於時邑有善舉無不預焉年五十尙無子七十有子七人人咸謂積善之報君其長也幼穎悟父母奇愛之一日州同公過先君塾中見其所以教培系兄弟者心敬異之乃命君受業焉君時方九齡培系年十二自此以至弱冠凡讀書作文字飲食

居處無不與君共之君沈默寡言所誦讀不煩督責先君視之
異於羣弟子年十四丁生母程太宜人憂哀毀如成人早有文
譽年十六七與邑中知名士結社相酬唱辛丑秋修禊於邑東
石照山繪圖賦詩君年最少儕輩皆折服癸卯秋先君膺疾君
與培系星夜走二十里求醫藥先君捐館君襆被就培系兄弟
於苦山中與同臥起古所謂心喪於君見之甲辰君與培系兄
弟讀書郡城之紫陽書院是歲以古學受知於督學李文敏公
芝昌補徽州府學生丙午偕培系就試金陵擢邗江覽紅橋竹
西諸勝阻風京口登金山寺浮圖培系及半欲止君強捋培系
手直窮其巔於是道吳門溯錢塘泛舟西湖經月始返是時購
得洪穉存孫鼎如黃仲則諸先生箸述慨然有志其爲人鼎如
先生集中有釋人一篇君博稽古訓爲之疏通證明嘉定朱亮

甫先生

右曾

見其書曰某行年五十閱人頗多英年嗜學如君

者實所罕覲君益自奮勵常思發名成業以顯揚其親未幾周

太宜人暨州同公相繼棄養君營葬事畢乃負笈杭州從溧陽

繆武烈公

梓

習制舉業君弱冠以前所作時藝不甚合繩墨而

時有英銳之氣至是武烈公教以古文之法爲時文君乃大喜

每聞公緒論條記爲一編曰尊聞錄心摹手追務竟其學已未

舉於鄉庚申春計偕入都至清江道梗折回是歲二月粵匪竄

績溪君舊居大廈一夕變爲灰燼遺業蕩然杭城旋亦失守君

歸則已無家乃攜眷屬奔走浙東西自是烽火驚天幾無所託

命矣壬戌杭城再陷君挈幼子良駒間關險難同至蘇州遇救

得脫旋由滬上附輪船北上乙丑會試報罷援例授內閣中書

尋乞假南歸戊寅會試復不第乃捐陞郎中分發戶部山西司

是時仕途冗雜司員需次甚夥君資淺無可自見仍以箸書爲事不妄與人酬酢體素羸又以更歷憂患精力損耗壬申二月與培系書云嘗以風塵馳逐驗輪蹄之鐵每歲必銷寸許況以脆薄之身當之無怪其然矣某入都來痔瘡已成痼疾頻發無休而他疾之嬰身者靡月不有年未五十興致索然數年後便料理歸休矣人生能得數十卷書以傳後而有佳子孫以葆守勝於萬戶侯多多矣某思之慕之而東塗西抹迄用無成可懼也此君之絕筆嗚呼君固淡於宦情篤於撰述曩見家竹邨先兄郝蘭皋年丈皆官戶部竝以絕學名當世竊冀君踵其轍天柰何旣嗇其遇又嗇其年使君仕宦旣不成箸書又不就徒抱其所蘊蓄而鬱鬱以終斯生人之極哀已君少有至性事父母愉色婉容終身有孺子之慕與諸弟尤友愛少弟祥麟以浙江

候補府經歷從戎衢州積勞成疾君得耗促裝赴衢爲之稱藥
量水衣不解帶者匝月弟歿又爲扶輓歸葬行路哀之君身裁
中人文弱如不勝衣而遇事有膽略於所親厚同患難託死生
毅然引爲己任與人交不爲崖岸和易溫婉人以是親之然胸
中涇渭劃然不肯隨俗俯仰嘗歷數交游私爲籍記而第其甲
乙培系戲謂曰君爲月旦評乎抑爲古今人表乎君笑謝之培
系與君客繆武烈公前後六七年與同門餘姚周君雙庚會稽
趙君撫叔溧陽王君西垞繆君芷汀稗循昆季以文章道誼相
切磋數君俱負雋才然皆雅愛君每考古訂今搜奇選勝非君
在不樂也一時經學淹通之士如歸安楊君見山德清戴君子
高皆與君一見如舊相識居京師時潘伯寅先生方官戶部侍
郎引爲文字交潘氏滂喜齋所刻唐釋湛然輔行記君所掇錄

也君之援例戶曹也王君西垞厚資之君歿潘司農暨家芸楣
比部爲之經紀其喪且爲歸其旅櫬及其眷屬又爲刻其遺書
數公風誼爲不可及亦君之賢有以致之也君總角能詩初學
太白稍長自以爲不足傳遂不復作駢體文有齊梁風味亦不
多作先君授以段氏說文注顧氏音學五書江氏四聲切韻表
諸書遂通聲音訓詁之學後見高郵王氏書益篤嗜之雖在逆
旅中塵積滿案暇必展卷翫索每得一義則怡愉累日庚申以
後不獲常聚首然每見輒以所心得者相質證娓娓不倦少時
所箸釋人疏證左傳服氏注義通俗文疏證俱燬於兵火中年
多病因治醫術時有超悟後於都肆得宋刻內經乃以元熊氏
本明道藏本及唐以前古書悉心校勘發明古義撰內經校義
草創未就今存數十條詁說精確其義例略如王氏讀書雜誌

又爲從兄印溪校刊先茗溪公孔子編年於本書之外博考先聖事蹟之見於他書者以爲之跋極稱賅洽又淮南子一切經音義均有校本又著有墨守編正名錄俱未成君精刻印工篆書得秦漢人遺意至今學者珍之性嗜蓄書每下直輒至瑯琊厥書肆蒐求善本觸其所好必購得之雖典質不少恡所積至五千餘卷嘗自言於春秋慕叔向於西漢慕劉向欲顏所居曰二向堂其志趣如此吾族人丁蕃盛培系與君自始祖以下十五傳皆同祖嗣後各爲一支培系於君爲族叔祖君幼受經於先君遂倍相親暱中更多難倚之如左右手遇困阨君恆典衣濟之培系爲戚某所齟齬君力爲捍蔽不避嫌怨培系性褊急於內外人已閒每不善處多致繆盭君常婉言諷諭當抑鬱不自得時得君一言輒渙然冰釋亦不自知其何心也蓋自少至

老數十年共嘗甘苦不以榮枯得喪易其心者惟君一人而已
方謂生爲我鮑叔死爲我巨卿豈意君竟先我而逝耶傷哉君
生於道光五年乙酉四月初二日卒葬邑南門外之洪上塘娶
周氏封宜人再娶萬氏子二長良恭議敘九品銜周出次良駒
國子監生萬出女二俱周出一適李一適孫男
人孫女人良駒器宇魁偉舉止頗肖君殆能世其學者光緒
六年歲次庚辰八月族叔祖培系謹狀

黃帝內經素問校義

績溪胡澍學

素問

宋林億等校曰按王氏不解所以名素問之義全元起有說云素者本也問者黃帝問岐伯也方陳性情之源五行之本故曰素問元起雖有此解義未甚明按乾鑿度云夫有形者生於無形故有太易有太初有太始有太素太易者未見氣也太初者氣之始也太始者形之始也太素者質之始也氣形質具而病瘵由是萌生故黃帝問此太素質之始也素問之名義或由此俞氏理初持素目錄序曰素問名義如素王之素黃帝以大神靈徧索先師所惜著之精光之論仍復請藏慎傳古人刑名八索九丘素索丘皆空也刑病皆空設之